

入見要以用漢法比內諸侯固稱病遂不入見遣子次

公入宿衛嬰齊薨諡為明王太子興嗣立其母為太后

太后自未為嬰齊妻時曾與霸陵人安國少季通師古曰姓

安國字少季及嬰齊薨後元鼎四年漢使安國少季諭王王

太后入朝令辯士諫大夫終軍等宣其辭勇士魏臣等

輔其決師古曰助衛尉路博德將兵屯桂陽待使者王

年少太后中國人安國少季往復與私通國人頗知之

多不附太后太后恐亂起亦欲倚漢威師古曰倚音於綺反勸王

及幸臣求內屬即因使者上書請比內諸侯三歲壹朝

除邊關於是天子許之賜其丞相呂嘉銀印及內史中